
“Озодлик”нинг сўровига кўра Фарғона вилояти ҳокимлиги ахборот хизматининг БИЛДИРИШИ

Сўнги кунларда “Озодлик” радиоси томонидан Фарғона нефтни қайта ишлаш заводи тасарруфида бўлган собиқ “Нефтчи” спорт мажмуасининг тақдири ҳақида кетма-кет мақолалар эълон қилинди. Уларда айтилишича, мазкур спорт мажмуасида ишлаб келаётган 79 нафар мураббий ва техник ходимлар, шунингдек, спорт тўғаракларида шуғулланаётган 2000 нафар бола кўчада қолган.

Шуни маълум қиламизки, Ўзбекистондаги очиқлик сиёсати иқтисодий соҳаларда ҳам ўз аксини топмоқда. Фарғона нефтни қайта ишлаш заводининг ишлаб чиқариш қувватларига тегишли улуши индонезиялик тадбиркорлар томонидан сотиб олинди. Келгусида корхонани модернизация қилиш учун инвесторларнинг қарийб 1 млрд доллар инвестиция киритиши режалаштирилган.

Маълумки, заводнинг ёрдамчи хўжаликлари, хизмат кўрсатиш тармоқлари ва ижтимоий мажмуалари ҳам бор эди. Уларнинг бир қисми сотувга қўйилди. “Нефтчи” спорт мажмуаси эса ҳокимлик балансига ўтказиб берилди. Шу кунларда мазкур мажмуанинг фаолият йўналишлари сақланган ҳолда болалар ва ўсмирлар спорт мактаби, футбол академияси ташкил этиш устида иш олиб борилмоқда. Айтилган вақтга қадар “Нефтчи” спорт мажмуасида ишлаган барча мураббийлар, ўзлари истасалар, шу ерда фаолиятларини давом эттиришади. Келгусида спорт мактабига жалб этиладиган шуғулланувчилар сонини 2500 нафарга етказиш кутилмоқда.

“Озодлик” радиоси журналистларининг “Нефтчи” спорт мажмуаси тақдиридан “қайғуришлари” асоссиздир.

2019-10-25 11:28:03